

陳大夫佩珩先生六旬晉一壽言

頌陳大夫者曰天生大夫非爲陳宗爲湘人故也故今之壽大夫亦非爲大夫爲湘人故也按大夫今年裁六十有一耳大夫之大有造於湘人湘人祝之其耄耋期頤自在意中湘人何亟亟壽大夫爲曰大夫有造於湘人湘人固不能不圖所以酬之富貴康寧大夫所自有則惟以壽大夫者酬大夫云爾大夫之試用湖北也澤不及湘湘人可無言其被選爲會議廳諮議局議員也所議關民生利病所條列亦往往爲當道採擇施設矣顧非湘人人人受其澤者湘人可無言其兼任軍需司次長也

軍事非所專治且亦非湘人人人受其澤者湘人亦可無言至若湘人所不能無言者則孰能禁其不以壽言壽大夫也耶有商人壽大夫者曰某歲某署之緝盜也署之役嗾嗾所得盜以賊誣商訴之縣不得直訴之府又不得直大夫適創商務總會則走投大夫大夫白之然後伸吾商人非大夫無聲勢小商不知幾十家破產矣有嫠攜孤兒壽大夫者曰自吾親捐背吾兄與姊夫計鬻吾妓家大夫適充議事會議員則泣於大夫門大夫立使召吾兄吾姊夫則走矣大夫又擇士人遣吾嫁聞吾輩受大夫庇者往往是也非大夫吾輩不妓亦鬼久矣有嘗職財政

司事壽大夫者曰民國初立政出革黨革黨專務召募計月餉須百餘萬非大夫與爲委蛇消而竭之吾湘公私掃地盡矣有嘗在收幹路歸國有時與路事者壽大夫曰某督辦之來威燄熏灼其鳴義狼攫駸駸欲噉人非大夫善導多諷固斥深拒掣之誅之使噤不得橫卒卒去吾湘商民當索之枯魚肆矣有從大夫與代表路事者壽大夫曰交通部狃舊習訂還股路約民所受甚艱且紆非大夫據法與情力持之湘人不獲較他路還股獨優矣有與議還股條章者壽大夫曰政府雖以路政失敗湘中後來者猶力圖媚之遂其貪進計設苛例且便乾沒也部

電果促行非大夫嚴責而切駁之湘路路股國還之湘民者將不還之湘民而半入之二三司出入者手矣且夫湘人所恃以爲生政府奪之無怪也政府非湘人也湘人所失湘人復得之而湘人或起而牟之一湘人不得逞一湘人又欲構而收之是二三湘人蝕百千萬湘人也天不肯使百千萬湘人蝕於二三湘人迺特生一湘人以甦之又使適當生湘人之道適執生湘人之權遂使百千萬湘人幾死於二三湘人者舉生於一湘人之手所憾者百千萬湘人未必盡知之耳雖然使百千萬湘人盡知陳大夫實生我大夫壽筵能容此百千萬湘人之拜且祝

乎哉乃爲頌曰

大夫有兄東方方伯恩於東方未逮鄉國大夫有官巡於郢中
郢雖受恩不如鄉邦既執財柄遂惠於近酬之壽酒以酌以酌
大夫未衰又有令子大夫松喬子爲蘭芷湘壽大夫我爲之宣
以頌大夫侑之壽筵

民國三年冬十月二十二日高等師範學校教員愚弟臨湘吳
獬頓首拜撰